

lum paulo ante commemoratum venerantur. ferina victitant ; & pretiosas pelles Russiæ Duci pro tributo ferunt. Nullæ hic urbes aut arces, ac ne pagi quidem.

*Lucomoria
Regio.*

Hæc regio longo tractu juxta mare septentrionale protenditur. Incolæ passim in sylvis & campis degunt. Huic regioni confines sunt; Grustintzi & Serponowtzi, à castro Grustina ad lacum Kitaysko sito ita dicti. Ab hoc lacu homines nigri, communis idiomatis ignari, ad Grustinam arcem solent accedere, varias merces deferentes, præcipue uniones, gemmasque varias, quas Grustintzi ab ipsis permutatione mercantur. Omnes autem Lucomoriæ incolæ magno Duci sunt vectigales. Ex Lucomoriæ montibus Cossin fluvijs oritur, qui in magnum fluvium Tachuum descendit.

*Loppia
Regio.*

A Lucomoria ultra tendendo secundum mare glacile Loppi populi agunt, barbarum & brutum hominum genus, qui incertis sedibus vagantur, piscibus & ferina victitantes, & panis usum omnino ignorantes. Idioma proprium habent, & Russiæ Duci tributum pendere dicuntur. Regio illorum frigidissima est.

Samoeda.

Libet hic etiam mores & habitum Samoedarum referre, quos à Belgis nostris observatum est feritatem quidem præferre; esse tamen ingenio satis capaci & ad res percipiendas idoneo, quum & de maris vicini natura apposite responderent. Vestitum habent è pellibus renorum, quibus à capite ad calcem usque muniun-

tur. Coma omnibus promissa, eaque in cirrum composita de scapulis propendet. Statura illis brevis, facies lata & plana, oculi parvi, crura brevia, genibus prominentibus. Agiles sunt, cursu juxta valentes atque saltu. Trahas eorum renones promovent, tam celeri cursu ut equos superent. Sunt idololatæ, habentque sigilla quædam lignea, impolita & rudia, quæ numinis loco colunt precibus & sacrificiis. Nullas habent urbes, sed gregatim in campis degunt, regunturque à senioribus aliquot. In victu sunt immundi; victitantque ferina fere; frugum panisque penitus ignari. Optimi sunt sagittarii: accepto namque nummulo, & stipiti affixo, tam certo è longinquo, ut vix videre illum possint, eum tangunt, ut miraculo sint intuentibus. Arcus è lento & flexibili quodam ligno fabricant: sagittas lapidibus acutis aut piscium spinis asperant: easdem spinas pro acubus usurpant; uti & nervos quorundam animalculorum pro filis. Tuguriola sua pellibus alcium & similibus animalium contegunt. Divitiarum ipsis magnus contemptus; adeo ut ne pretiosas quidem pelles, quibus supra modum abundant, ullo loco habeant.

Inter fluvios hic maxime eminet *Dwina*, qui in Wologda provincia scaturiens, magno gyro circumacto recta descendit versus arctum, & per sex ostia se condit in sinum S. Nicolai. coalescit è duobus amnibus, Iug & Suchana; unde illi nomen; nam *Dwina* Russis *binos* notat.

